

五代會要

卷一百一十五



五代會要卷三

宋

王

溥

撰

廟制度

後唐天成三年十一月太常定舊少帝爲昭宣光烈孝  
皇帝廟號景宗博士呂朋龜奏謹按禮經臣不誅君稱  
天以諡之是以本朝故事命太尉率百寮奉諡冊告天  
于園丘廻讀于靈前並布七日之內諡冊入陵若追尊  
定諡命太尉讀諡冊于太廟藏冊于本廟伏以景宗皇  
帝頓負沉寃歲月深遠園陵已修不祔於廟則景宗帝



親在七廟之外今聖朝申寃追尊定諡重新帝號須撰  
禮儀又禮云君不逾年不入宗廟且漢之殤冲質君臣  
已成晉之惠懷愍俱負艱難皆不列廟食止祀於園寢  
臣等竊詳故實欲請立景宗皇帝廟于園所命使奉册  
書寶綬上謚于廟便奉大牢祀之其四時委守令奉薦  
請下尚書省集三省官詳議施行左散騎常侍蕭希甫  
等請依禮院所奏勅宜令本州城內選地起廟哀帝崩于曹州  
立廟

四年五月中書門下奏先據太常寺定少帝諡昭宣光

烈孝皇帝廟號景宗生名為常哀乃承祧既號景宗合  
入宗廟如不入廟難以言宗於理而論祧一遠廟安少  
帝神主于太廟既昭穆序而宗祧正今或安居別廟卽  
請不言景宗但云昭宣光烈孝皇帝兼册文內有基字  
是元宗廟諱雖尋常勅詔皆不迴避少帝是繼世之孫  
不欲斥烈聖之諱今改基爲宗字從之

按風俗通陳孔璋云尊卑有殺

喪祭哀敬各有攸終欲令言著而可遵事施而不犯禮云卒哭之後率執木鐸于宮曰捨故而諱新故諱毀廟之主也畏遠屬絕名不可諱今昭宣上去元宗十四世奏改册文非典故也

晉天福四年十一月太常禮院奏議立唐廟引武德年



故事祀隋三帝今請立近朝莊宗明宗閔帝三廟庶合  
前規詔曰德莫重於繼絕禮莫重於敬先莊宗立興復  
之功明宗重光大之業逮于閔帝實帝本枝然則丕緒  
洪源皆尊唐室繼周者須崇后稷嗣漢者必奉高皇將  
啓嚴祠當崇茂典宜立唐高祖太宗及莊宗明宗閔帝  
五帝之廟其月太常禮院又奏唐廟制度請以至德宮  
正殿隔爲五室三分之南去地四尺以石爲埒中容三  
主廟之南一屋三門門戟二十有四東西一屋一門門  
無棨戟廟中牀鑪盤帳燭亭香寶案盛酒爵罍洗罇玷

位席祭服率如常制四仲之祭一羊一豚如其中祀幣  
帛牲牢之類光祿主之祠祝之文不進不署神厨之具  
鴻臚督之五帝五后凡十主未遷者六未立者四未諡  
者三高祖太宗與其后暨莊宗明宗凡六主在青化里  
之寢宮祭前二日以殿中織扇二十迎置新廟以行享  
禮莊宗明宗閔帝三后及魯國孔夫人神主四座請修  
製祔廟及三后請定諡法從之

周廣順元年二月太常禮院上言准勅遷漢廟入昇平  
宮其唐晉兩朝皆五廟遷移今漢七廟未審總移爲復



祇移五廟勅宜准前勅並移於昇平宮其法服神厨齊院祭器祭服饌科皆依中祀例用少牢先祿等寺給其讀文太祝及奉禮郎太常寺差每仲享以漢宗子爲三獻從之

三年九月太常禮院言准洛京廟室一十五間中分爲四室兩頭有夾室四神門每門屋三間每門戟二十四別有齋宮神厨屋宇准禮左宗廟右社稷在國城內請

下所司修奉從之

時太祖將行郊禮遷宗廟于東京故有是議

顯德六年七月詔以大行皇帝山陵有期神主特祔太

廟其廟屋宇合添修否國子司業兼太常博士聶崇義奏曰奉勅爲大行皇帝山陵有期神主祔廟恐殿室缺少合重添修今請廟內相度若是添修廟殿一間至五間並須移動諸神門及角樓宮墻仗舍及當殿正面檐楹堦道亦須近東省特立班位直至齋宮漸更迫窄今檢到古今禮文伏緣太廟東西各有夾室伏請遷易諸室安大行皇帝神主以合禮文者一按唐禮太廟唯有六室至開元元年加至九廟遂有九室至大歷十四年十二月十一日代宗神主將祔太廟太常奏緣遷祔須



五代會要 卷三  
加夾室中帟室又元和三年十月九日重修太廟先是宗正奏下所司卜擇起修日聞奏太常禮院詳定禮料其合通告九室奉移神主權于廟南門內殿庭少西設行廟幕殿一十二間置冊床幕屋五間告前二日有司陳設畢告料准常禮有司供備其行廟外令左右金吾守衛如式令重拆廟殿續更添脩不唯重勞兼恐未便竊見虛東西二夾室況有未祧遷之主欲請不拆廟殿更添間數即便將來室安排六室位次所有動移神主若准舊禮于廟庭權設行廟幕殿卽恐雨水猶多難于

陳設請權于太廟齊宮內安奉神主至修奉畢日庶爲宜稱一按禮記云廟成則于中屋剗羊以饋之夾室則用雞又大戴禮及通典亦有夾室察文觀義乃是備廟之制况新主祔廟諸經有遷易之名考古沿今庶令通理伏請遞遷諸室安大行皇帝神主以符禮意勅從之

### 禘祫

後唐長興元年九月太常禮院奏來年四月孟夏禘享於太廟謹按禮經三年一禘以孟夏五年一祫以孟冬已毀未毀之主並合食于太廟之廟逐廟功名之臣配



享于本廟之廟實應元年定禮奉景皇帝爲始封之祖  
既廟號太祖百代不遷每遇禘祫位居東面之尊自代  
祖元皇帝高祖太宗已下列聖子孫各序昭穆南北相  
向台食於前聖朝中興重修宗廟見享高祖太宗懿宗  
昭宗獻祖太祖莊宗七廟太祖景皇帝在祧廟之數不  
列廟享將來禘祫若奉高祖居東向之尊則禘享不及  
于太祖若以祧廟太祖居東向之位則又違于禮意今  
所修奉祧廟神主及諸色法物已備合預請叅詳事須  
具狀申奏勅下尚書省集義戶部尚書韓彥暉等奏議

伏以本朝尊受命之祖景皇帝爲始封之君百代不遷  
長居廟食自貞觀至于天祐無所改更聖祖神孫左昭  
右穆自中於國禮再議宗祀以太祖景皇帝在祧廟之  
數不列祖宗欲尊太祖之位將行東向之儀爰命羣臣  
同議可否伏覩本朝列聖之舊典明皇定禮之新規開  
元十年特立九廟子孫遵守歷代無虧今旣行七廟之  
規又已祧太祖之室昔德宗朝將行禘祫之禮顏真卿  
議請奉顯祖神主居東向之位景皇帝暫居昭穆之列  
考之於正元則以爲誤徵之於今日正得其禮今欲請



每遇禘祫之歲暫奉景皇帝居東向之尊自元皇帝已下序列昭穆從之

周顯德五年六月禘于太廟先是言事者以王家宗廟無祧廟之主不當行禘祫之禮國子司業聶宗義以爲前代備廟累遷及追尊未毀者皆有禘祫授引故事九條以爲其證曰魏明帝以景初三年崩至五年二月祫祭明年又禘自茲以後五年爲常且魏以武帝爲太祖至明帝始三帝而已未有毀主而行禘祫其證一也宋文帝元嘉六年祠部定十月三日殷祀其太學博士議

禘云按禘祫之禮三年一五年再宋自高祖至文帝纔亦三帝未有毀主而行禘祫其證二也梁武帝用謝廣議三年一禘五年一祫謂之殷祭禘祭以夏祫祭以冬且梁武乃受命之君僅追尊四廟而行禘祫則知祭者是追養之道以時移節變孝子感而思親故薦以首時祭以仲月間以禘祫序以昭穆乃禮之經也非闕宗廟備不備其証三也唐禮貞觀九年將祔高祖于太廟國子司業朱子奢請准禮立七廟是時乃立六廟而行禘祫今檢會要及通典并禮閣新儀皆載此禮並與實錄



符同此乃廟亦未備而行禘祫其証四也貞觀十六年四月己酉光祿大夫宗正卿紀國公段綸卒太宗甚傷悼為不視朝將出臨之太常奏禘祫祭致齊不得哭乃止此明太宗之時宗廟未備實行禘祫其証五也貞觀二十三年自九巖葬回迎神主于太極殿之西階日中行虞祭之禮有司請依典禮似神主祔廟高祖欲留神主于內寢旦夕供養申在生之敬詔停祔禮英國公李勣等抗表固請曰竊惟祖功宗德飾終之明典文昭武穆嚴配之明訓今停祔廟奉狗哀情卽據典章乖替為

甚又國哀已後而廟停時祭逾月之哀須申大祫以唐禮九廟觀之自太宗已上纔足七廟未有毀主將申大祫其証六也貞觀十六年四月癸丑有司言將行禘祭依今禮祫享功臣並得配享于廟庭禘享則不配請命禮官學士等議太常卿韋挺等議曰其禘及時享功臣皆應不預故周禮六功之官皆大蒸而已大蒸卽祫祭也梁初誤禘功臣左丞駿議武帝允而依行及周隋俱遵此禮竊以五年再祫合諸天道一大一小通人雅論小則人臣不預大則兼及有功今禮禘無功臣誠謂理



不可易太宗改令從禮載詳此論該曉歷代援據甚明又貞觀年中累陳禘祫其証七也高宗上元三年有司祫享于太廟止有七室未有遷主通典會要及禮閣新儀具明此禮其証八也中宗景龍三年八月帝將祀南郊欲以韋皇后助行郊禮國子司業郭山等議云皇朝舊禮圜丘分祭天地唯有皇帝親拜更無皇后助祭之文及時享并禘祫亦無助祭之事今據中宗之代國子祭酒等舉禘祫之文稱是皇朝舊禮又明太宗高宗之朝皆行禘祫其証九也疏奏從之

配享功臣

後唐莊宗廟故昭義節度使李嗣昭故幽州節度使周德威故汴州節度使符存審並長興二年四月勅

綠廟裁製

周廣順元年四月中書門下奏太常禮院申七月一日皇帝御崇元殿命使奉冊四廟准舊儀服袞冕卽座太尉引冊案入皇帝降座引立于御座前南向中書令舉冊案進皇帝指權推授冊使跪受轉昇冊官其進寶授儀如冊案臣等參詳至時訖皇帝降階授冊從之



二年九月太常禮院奏奉迎太廟神主到京未審皇帝親出郊外迎奉否檢討故事元無禮例伏乞召三省集議勅宜令尚書省四品已上中書門下五品已上同參議司徒竇貞固司空蘇禹珪等議案吳王孫休卽帝位迎其祖父子吳郡入祔太廟前一日出城野次明日常服奉迎此其例也遂署狀言以車駕出城奉迎爲是請下禮儀使草定儀制至十月禮儀使奏太廟神主將至前一日禮儀使出城掌次于西御庄東北設神主行廟幄幕面南其日放朝羣臣早出西門皇帝常服出城詣

行宮羣臣起居畢就次神主將至羣臣班定皇帝立于班前神主至太常卿請皇帝再拜羣臣俱拜神主就行廟幄幕坐設常饌羣臣班于神幄前侍中就次請皇帝謁神主既至羣臣再拜皇帝進酒畢再拜羣臣俱拜皇帝還幄羣臣先赴太廟門外立班俟皇帝至起居候神主至羣臣班于廟門外皇帝立于班前太常卿請皇帝再拜羣臣俱拜皇帝還幄羣臣就次官闈令安神主於本室訖羣臣班于廟庭太常卿請皇帝于四室奠享逐室皇帝再拜羣臣俱拜四室祔享畢皇帝還宮前件儀



注望付中書門下宣下從之

社稷

周廣順三年九月太常禮院奏社稷制度社壇廣五丈  
 高五尺五色土築之稷壇制度如社壇之制度社壇石  
 主長五尺方二尺剡其上方其下半根在土中四垣華  
 節每神門屋三間一門門二十四戟四隅連飾累恩如  
 太廟之制中可樹槐准禮左宗廟右社稷在國城內請  
 下所司修奉從之

時太祖將行郊禮故  
 遷社稷于東京修之

嶽瀆

梁開平三年八月詔曰封嶽告功前王重事祭天肆觀  
 有國常規朕以眇身恭臨大寶旣功德未敷于天下而  
 災祥互降于城中慮於告謝之儀有缺齊虔之禮爰修  
 昭報用契幽通宜令中書侍郎平章事于兢往東嶽祭  
 告訖

晉天福六年正月勅嶽鎮司方海瀆紀地載于祀典咸  
 福蒸民將保豐穰宜申虔敬其嶽鎮海瀆廟宇宜各令  
 修葺仍禁樵採

開運三年二月詔令復祭中嶽宜差河南少尹往彼行



禮故事五嶽皆本處觀察使親齋御降祝文行禮頃因張全義為河南尹以年德俱高遂令賓從攝祭近日兼差府屬卑官至是用左

周顯德七年十月詔今年冬祭海宜就差登州刺史張順起今後逐年就差更不差使

寒食拜埽

漢乾祐三年三月寒食隱帝奉皇后幸南御園家祭樞

密使三司使從之

人君奉先之道無寒食野祭近代莊宗每年寒食出祭謂之破散故襲而

之行

周廣順元年二月寒食太祖出元化門至蒲池設御帳

遙拜諸陵非人君之禮也

武成王廟

後唐長興三年五月七日國子博士蔡同文奏伏見武成王廟中每上戊釋奠漢留侯張良配坐武安君吳起等為十哲當排祭之時止于武成王張良十哲面前其范蠡等六十四人圖形於四壁面前並無酒醢自今後乞准本朝舊制例武成王廟四壁諸英賢畫像面前請各設一豆一爵祀享中書帖太常禮院檢討禮例分折申者禮院檢郊祀錄釋奠武成王廟中祀例祭以小牢



其配座十哲見今行釋奠之禮伏自喪亂已來廢四壁英賢之祭今准帖爲國子博士蔡同文奏武成王廟四壁英賢請各設一豆一爵祀享者當司今詳郊祀錄武成王從祀諸英賢各邊二實以粟黃牛脯豆二實以菜菹鹿醢簋簋各一實以黍稷飯酒爵一禮文所設無一豆一爵之儀奉勅武成王廟四壁英賢自此每至釋奠准郊祀錄各陳脯醢諸物以祭

周顯德五年閏七月兵部申春秋上戊釋奠武成王廟每祭差獻官三員初獻官上將軍充亞獻官上將軍充

終獻官將軍充於漢乾祐三年奉中書門下指揮帶使相上將軍不差自後祇差大將軍行事仍改亞獻爲再獻官終獻爲三獻官

### 祭器

周廣順三年九月南郊禮儀使奏用珪璧制度准禮祀上帝以蒼璧地祇以黃琮祀五帝以珪璋琮琥璜其玉各依本方正色祀日月以珪璋祀神州以兩珪有邸其用幣天以蒼色地以黃色配帝以自色日月五帝各從本方之色皆長一丈八尺其珪璧之狀璧圓而琮方珪



上銳而下方半珪曰璋琥爲虎形半璧曰璜其珪璧琮璜皆長一尺二寸四珪有邸邸本也珪著於璧而四出也日月星辰以珪璧五寸前件珪璧有圖樣而長短之說或殊按唐開元中元宗詔曰禮神以玉取其精潔比來用珉不可行也如或以玉難辨寧小其制度以取其真令郊廟所修珪璧量玉大小不必皆從古制伏請下所司修製從之

顯德四年四月禮官博士等准詔議祭器祭玉制度國子祭酒尹拙引崔靈恩三禮義宗云蒼璧所以禮天其

長十有二寸蓋法天之十二時又引江都集禮白虎通等諸書所說云璧皆外圓內方又云黃琮所以禮地其長一尺以法地之數其琮外方內圓八角而有好國子博士龔崇義以爲璧內外皆圓其徑九寸按阮氏鄭元圖皆云九寸周禮玉人職又有九寸之璧及引爾雅云肉倍好謂之璧好倍肉謂之瑗肉好若一謂之環郭璞註云好孔也肉邊也而不載尺寸之數崇義又引冬官玉人云璧好三寸爾雅云肉倍好謂之璧蓋兩邊肉各三寸通好共九寸則其摩九寸明矣崇義又云黃琮八



方以象地每各剡出一方六寸共長八寸厚一寸按周禮疏及阮氏圖並無好又引冬官玉人云琮八角而無好崇義又云琮璜珪璧俱是禮天地之器而爾雅唯言璧環瑗三者有好其餘諸器若琮璜等者並不言之則璜琮八角而無好明矣時太常卿田敏以下以崇義援引周禮正文爲是乃從之

牲牢

梁開平二年七月勅祭祀之典有國大事如聞官吏慢於恪敬禮容牲選有異精處宜令御史臺跡其條件聞

奏

周顯德二年八月兵部尚書張昭等奏今月十二日奉聖旨以每年祀祭多用太牢念其耕稼之勤更備犧牲之用比諸豢養牲可愍傷令臣尋討故事可以備牲代否臣仰稟綸言退尋禮籍其三牲八簋之制五禮六樂之文著在典彙迭相沿襲累經朝代無所改更臣聞古者燔祭黍稷尚多質略近則梁武麩牲竹脯不可宗師雖好生之德則然于奉先之儀太劣蓋禮主於信孝本因心黍稷非馨鬼神享德不必牲牢之巨細籩豆之



方圓苟血祀常保於宗祧而犧牲何須於繭粟但以國  
之大事儒者久行易以他牢恐未爲便以臣愚管見其  
南北郊宗廟社稷朝日夕月等大祠如皇帝親行事備  
用三牲如有司攝行事則用少牢已下雖非舊典貴減  
犧牛其日太常少卿田敏又奏臣奉聖旨爲祠祭用犢  
事今太僕寺供犢一年四季都用犢二十二頭唐武德  
九年十月九日詔祭圜丘方澤宗廟已外並可止用少  
牢用少牢者用特牲時和豐年然後克修常禮又天寶  
六載正月十三日赦文今後每大祭祀應用騂犢令所

司量減其數仍永爲常式其年起請以舊料每年用犢  
二百一十二頭今請減一百七十三頭止用三十九頭  
餘祀享並宜停用犢至上元二年九月二十一日赦文  
圓丘方澤並依常式宗廟諸祠臨時獻熟其年起請昊  
天上帝太廟各太牢一餘祭則令隨事而供若據天寶  
六載自二百一十二頭減用三十九頭據武德九年每  
年用犢十頭圓丘四方澤一宗廟五據上元二年起請  
惟昊天上帝太廟又無方澤祇九頭矣今國家用牛比  
開元天寶則不多比武德上元則過其大半按會要太



僕寺有牧監掌孳課之事乞今後太僕寺養孳課牛其  
犢遇祭昊天前三月養之滌官取其湯滌清潔餘祭則  
否若臨時買牛恐非典故奉勅今後祭園丘方澤社稷  
並依舊用犢其太廟及諸祠宜准上元二年九月二十  
一日制並不用犢如皇帝親行事則依常式其日又詔  
曰今後諸祠祭應有牲牢香幣饌料供具等仰本司官  
吏躬親檢校務在精至行事儀式依附禮經大祠祭合  
用樂者仍須祀前教習凡闕祀事宜令太常博士及監  
察御史用心點檢稍有因循必行朝典



臣徐立綱恭校

五代會要卷四

宋

王

溥

撰

緣祀裁製

梁開平三年九月詔曰國之大事惟祀與戎須委元臣以專重務今後在京大小祀及諸色祠祭並委宰臣薛貽矩專判

後唐同光三年三月十日祠部奏本朝舊儀太微宮每年五薦獻其南郊壇每年四祠祭吏部申奏請差中書門下攝太尉行事其太廟及諸郊壇並吏部差三品以



上攝太尉行事從之至其年七月中書門下奏據尚書  
祠部狀每年太微宮五薦獻南郊壇四祠祭並宰相攝  
太尉行事唯太廟時祭獨遣庶僚所爲舊規慮成闕禮  
臣等商量今後太廟祠祭亦望差宰臣行事從之

三年十一月禮儀使奏伏准禮經喪三年不祭唯天地  
鬼神社稷爲越紼行事此古制也爰自漢文益尊神器  
拘至公絕私之義行以日易月之制事久相沿禮從順  
變今園陵已畢祥練旣除宗廟不可以乏享神祇不可  
以廢祀宜從禮意式展孝思伏請自正簡太后升祔禮

畢應宗廟樂及羣祀並准舊施行從之

天成四年九月太常寺奏伏見大祠則差宰臣行事中  
祠則差諸寺卿監小祠則委太祝奉禮今後凡小祠請  
差五品官行事從之其年十月二十七日中書門下奏  
太微宮太廟南郊壇宰臣行事宿齋百官皆入事伏以  
奉命行事精誠宿齋旣徧見於朝官不涉處於祠祭今  
後宰臣行事文武兩班望令並不得宿齋處者奉勅宜  
依其年十二月中書門下奏今後宰臣致齋內請不押  
班不知印不赴內殿起居或遇國忌應行事官受誓戒



五代會要 卷四  
後並宜不赴行香拜不奏覆刑殺公事及大祠致齋內  
請不開宴從之

長興二年五月尚書左丞崔居儉奏大祠中祠差官行  
事皇帝雖不與祭其日亦不視朝伏見車駕其日或出  
於禮不便今後請每遇大祠中祠車駕不出從之

四年二月太常博士路航奏比來小祠已上公卿皆著  
祭服行事近日唯郊廟太微宮具祭服五郊迎氣日月  
諸祠並祇常服行事兼本司執事人等皆著隨身衣裝  
狼藉鞞屨便隨公卿升降於壇墀按祠部令中祠已上

應齋郎等昇壇行事者並入給潔服事畢收納今後中  
祠已上公卿請具祭服行事執事昇壇人並著履具緋  
衣幘子又臣檢禮閣新儀太微宮請卯時行事近年依  
諸郊廟例五更行事今後請依舊以卯時從之

清泰元年五月中書門下奏據太常禮院申明宗今月  
二十日祠廟太尉合差臣攝行緣馮道假李愚十八日  
私忌在致齋內今劉昫又奏見判三司事煩請免祠事  
今與禮官叅酌諸司忌日遇大朝會入閣宣召尚赴朝  
叅今祠享事大忌日屬私致齋日請比大朝會宣召例



五仁會要 卷四 三  
差李愚行事從之

晉天福七年十一月勅天地宗廟社稷及諸祠事等訪問自前所司承寬多不精潔宜令三司預支一年諸司合請祠祭禮料物色等於太廟置庫仍差宗正丞石載仁專主掌監察御史宋彥昇監庫兼使供奉官陳審璘往洛京於太廟內穩便處脩蓋庫屋五間俟畢日催促所支物色監送入庫交付訖取收領文狀歸闕每有祠祭諸司合請禮料至時委監庫御史宋彥昇宗正丞石載仁旋旋給付其大祠中祠兼令監察使檢點饌造小

祠卽令行事官檢點如致慢易本司當准格科罪其祭器未有者脩製已有者更仰雅飾

開運三年六月西京留司監察使奏以祠祭所定行事官臨日或遇疾病或奉詔赴關留司稟勅已遲乞以留司吏部郎中一人主判有缺便依次第定名庶無缺事從之

周廣順三年九月南郊禮儀使奏郊廟祝文按禮例云古者文字皆書于冊唐初悉用祝版唯陵廟用玉冊元宗親祭郊廟用玉爲冊德宗朝博士陸淳議准禮冊祝



五仁會要 卷四  
版祭祀訖燔之乃從其議正元六年親祭又用竹冊今  
詳酌禮例用祝版爲宜從之

顯德五年閏七月一日御史臺奏見行事件諸司寺監  
逐季請到祇祭禮料幣帛脚錢等於宗正寺監祭使與  
本寺官同掌候至日供應逐季所祭享郊壇祠廟並是  
禮部差官具名銜牒報監祭使大祠前七日赴尙書省  
受戒誓如其日有官不到具名銜申奏申堂前三日致  
齋前二日請道引赴祠所中祠不受戒誓前二日致齋  
前一日請道引赴祠所小祠不受戒誓候吏部牒到獻

官名銜監祭使點檢封記印禮料并諸司祇應人等發  
牒差驅使官管押赴所交割逐祠祭諸司赴郊壇所等  
至午時與公卿行事官立班告潔省牲點饌畢給付大  
官令監廚造饌至來日五更於壇所食饌畢行事點檢  
有食饌祭器不精應奉有缺其本司人吏量罪責罰郊  
壇太廟宰臣攝太尉行事至受誓戒及赴祠廟日監祭  
使具錄公卿行事官名銜申迎班狀應行事官未受誓  
戒前牒陳有故請假並是吏部別差官行事如受誓戒  
後及致齋之內有官陳牒有故請假監祭使差次官通



攝行事祠齋前一日本寺按閱申堂如至行事日音律樂官祇應前公卿等並聽別勅指揮諸祠祭有同日享祀監祭使具狀申御史中丞請差官祀若是無官可差監祭使牒太常博士通攝如缺太常博士監祭使通攝祠祭行事公卿官員職掌等每至冬寒請柴炭太常禮院差禮生請給監祭使監散

親謁陵

後唐末帝清泰三年九月車駕將北幸太常博士段顥奏河陽路當徽陵今車駕經由合親朝謁於是至陵所

朝拜

周世宗顯德元年六月車駕征太原回親拜嵩陵望陵號慟至陵所俯伏哀泣感於左右再拜訖祭奠而退賜奉陵將吏及近郊人戶帛有差

公卿巡陵

後唐清泰二年正月宗正寺奏北京永興長寧建極三陵應州遂衍奕三陵准曹州溫陵例下本州府官朝拜雍坤和徽四陵太常宗正卿朝拜從之

晉開運三年七月八日中書門下奏太常禮院狀得宗



正寺牒今年八月擇日朝拜諸陵今太卜署擇用八月十二日庚午告北京義惠康昌四陵准天福二年七月勅宜就昌陵都朝拜其朝拜官以本府上佐官充行事禮料亦准上供備

皇后陵

後唐同光三年十月正簡皇太后墓于坤陵初上欲相於代州太祖園陵中書門下奏議曰伏以人君以四海爲家不當分南北洛陽是帝王之宅四時朝拜理須便近不能遠幸代州今漢朝諸陵皆近秦雍國朝陵寢布

列京畿後魏文帝自代遷洛之後園陵皆在河南兼勅應勲臣之家不許北葬今魏氏諸陵尚在京畿相葬代州理爲未允從之

雜錄

後唐同光二年三月以尚書工部郎中李途爲長安兩路檢視諸陵使其年五月二十四日勅宗正寺嚴切指揮諸陵臺令丞不得輒令影占人戶其諸陵舊例合破巡人仍令酌量額定數目自本州縣于中等人戶內差遣交付陵所切不得自招影占人戶攬擾鄉村致妨縣



司差遣色役使仰密具本官姓名申奏當行朝典仍具條約曉示諸陵臺及本州縣訖聞奏其年八月中書門下奏諸陵臺令丞並請停廢以本縣令兼知陵臺事從之

二年六月勅關內諸陵頃因喪亂例遭穿廢多未掩修其下宮殿宇法物等各令奉陵州縣府據所管陵園修製仍四時各依例薦享逐陵各差近陵百姓二十戶放雜差役充陵戶以備灑掃其壽陵等一十陵亦一例修掩量差陵戶仍授尚書工部郎中李途京兆少尹充奉

脩諸陵使

周廣順元年正月赦文唐莊宗明宗晉高祖宜各置守陵十戶以近陵人戶充五月宗正寺奏准諸陵故事有令丞各一員近令丞不置便委本縣令兼之今緣河南洛陽是京邑恐兼令丞不便伏候勅旨勅特置令丞各一員

忌日

後唐天成三年又八月九日勅尚書兵部郎中蕭愿奏每遇宗廟不樂之辰宰臣到寺百官立班是日降使賜



香准案禁樂斷屠宰止刑罰者帝忌后忌之辰舊制皆有齋會蓋申追遠以表奉先多難己來此事久廢今後每遇大忌宜設僧道齋一百人列聖忌日齋僧道五十人忌日既不視朝固難舉樂所奏止刑罰斷屠宰宜依兼河南府向來送酒行香宰臣自此止絕天下州府至國忌日並令不舉樂止刑罰斷屠宰餘且依舊

四年十二月中書門下奏今後大忌前一日請不坐朝從之

晉天福五年正月御史中丞竇貞固奏每遇國忌行香宰臣跪爐僧人表讚文武百官儼然列坐今後伏請宰臣跪爐百官依常位立班從之仍令行香之後齋僧一百人永爲定制

諱

後唐天成元年六月十二日勅朕聞古者酌禮以製名懼廢於物取其難犯而易避貴便于時况徵在二名抑有前例恭以太宗皇帝自登寶位不改舊稱時臣有世南官有民部靡聞曲避止禁連呼朕以渺躬托於人上冀遵聖範非敢有廢文書內所有二字但不連稱並不



五仁會要 卷四 九  
得迴避如是臣下之名不欲與君親同字者任自便改務從所便庶體予懷

三年正月詔曰本朝列聖及新追四廟諱近日章奏偏傍文字皆闕點畫凡當出諱止避正呼若迴避於偏傍則虧缺於文字宜從朴素庶便公私此後凡廟諱但避正文其偏傍文字不必減少點畫其年八月詔曰凡有姓犯廟諱者改以本望爲姓

清泰二年五月中書門下奏御名上一字與諸王相連按太宗元宗廟故事人臣諸王合避相連字改從單名

從之

晉天福三年二月中書門下奏禮經云禮不諱嫌名二名不偏諱注云嫌名謂聲音相近若禹與雨邱與蘆也二名不偏諱孔子之母名徵在言在不稱徵言徵不稱在此古禮也唐太宗元宗二名皆諱人姓與國音聲相近是嫌名者亦改姓氏與古禮有異若廟諱平聲字卽不諱側聲若諱側字卽不諱平聲所諱字正文乃偏傍皆闕點畫望令依今式施行勅朝廷之制今古相沿道在人宏禮非天降况以方開歷數虔奉祖宗雖逾孔子



五仁會要 卷四  
之文爽周公之訓冀崇孝行永載簡編所爲一名及嫌  
名事依唐朝施行

冊命

梁開平元年八月勅朝廷之儀封冊爲重用報勲烈以  
隆恩榮固令親式光舊章久缺自我復行今後每冊封  
大臣宜令有司備臨軒之禮

後唐同光二年三月太常禮院奏准制尙書令秦王李  
茂正備禮冊命檢詳舊儀無不帶節度使封冊之命宜  
准故襄州節度使趙匡凝封楚國例施行秦王受冊自

備革輅一乘載冊犢車一乘并本品鹵簿鼓吹如儀從  
之

三年六月太常禮院奏吳越國王錢鏐將行冊命按禮

文合用竹簡勅宜令有司脩製玉冊俾稱元勲

議者以玉冊帝

王所用不合假諸人臣蓋當樞密院承旨段迥受錢鏐之賂曲隨其請樞密使郭崇韜不詳典禮故也

天成三年十一月十八日中書奏舊制凡降勅命至尊  
臨軒伏自陛下纂襲繼有封崇但申節度之儀尙缺臨  
軒之禮今後或封冊請御正衙雖勞萬乘之尊冀重九  
天之命如此則行之時禮備受之者感深寧唯轉耀于



皇猷實亦永標於青史從之仍付所司

清泰元年六月中書門下奏據太常禮院申冊拜王公如在京城所司備函簿車輅法物皇帝臨軒行冊禮如在在外鎮正衙命使押冊赴本道行禮車輅法物故事不出都城禮無明文今奉制命幽州趙德均封北平王青州房知溫封東平王皆備禮冊命其合用車輅法物在兵部太常太僕寺請載往本州行禮後送納本司從之

舉人自代

後唐清泰二年正月尚書吏部員外郎劉斥鼎奏臣伏

觀建中元年正月勅中外文武臣寮授官上任後三日舉一人自代事下中書如除用選人所薦多者擬議多事已來此勅久廢今後重乞舉行從之

漢乾祐元年正月勅節文應內外常叅官宜准唐建中故事上任後三日表舉一人自代

後唐天成二年六月戶部尚書李麟奏應昇朝官四品以上各許薦令錄兩人五品六品官各許薦簿尉兩人勅所舉人除官後仍於官告內坐舉官姓名赴任之後或有不公連坐舉主兼三品已上有舊諳行止堪充兩



使判官者各具才業上聞

周顯德二年正月二十一日御札一應在朝文資官翰林學士兩省官內有曾歷藩郡賓職州縣官者宜各舉堪爲令錄者一人務在強明清慎公平勤恪其中有已曾任令錄亦許稱舉並當擢用不拘選限資序雖姻族近親亦無妨嫌祇須舉狀內具言除官之日仍具舉主姓名若在官貪濁不公懦弱不治職業廢缺處斷乖違並量事狀輕重連坐仍令御史臺催促本官旋具奏聞限兩月舉狀齊足如出使在外者候迴日准此指揮

四年六月勅一應在朝文資官各令再舉一人堪充令錄及兩使防禦團練軍事判官者自前或因公過微有殿犯者亦許稱舉餘准顯德二年正月二十一日御札處分其年八月詔應在朝上將軍統軍大將率府副率等宜令各舉有武勇膽力騎射趨捷堪爲軍職者兩三人仍具年歲及歷職去處聞奏如已在禁軍者不在稱舉候舉到日並當比試騎射看驗人材雖是相親亦宜公舉但于狀內具言如應任用之後不副所舉卽量事狀輕重坐舉主



五年五月詔在朝文資官各令再舉堪爲幕職令錄首一人所舉幕職州縣官罷任後便與除官仍並許赴闕  
皇太子親王見三師禮

後唐長興四年七月三日太常寺奏奉勅詳定太子諸王見師傅禮如左一准開元禮皇太子與師傅保相見前一日尉衛設次於宮門外道西南向伶官展軒懸於庭其日諸衛所部屯門列仗典謁設師傅保位于西階之西東向三少位次之少退俱東向北上師傅保及三少至宮門通事舍人引師傅保就次左庶子奏中嚴伶

官師工人入就位通事舍人引師傅保及三少立于正殿門西差退俱東向左庶子奏外辦皇太子著從省服以出侍衛如常承和樂作至東階下西向立樂止通事舍人引師傅保及三少樂作就位樂止皇太子再拜師傅以下答拜若三少見時則三少先拜通事舍人引師傅以下出樂作出門樂止左庶子跪奏稱臣某言禮畢一又准禮閣新儀皇太子受冊後前二日尚舍設次于崇明門外南向又設師傅保中書門下文武百官東西相向以北爲上宮臣及皇親陪其後次左庶子奏外備



中官褰簾皇太子常服出次南向立侍從如常儀次中書門下就北向位再拜訖禮官贊皇太子再拜訖中書門下班首一人前進賀訖復位再拜皇太子答賀訖又再拜皇太子揖中書門下訖相次退通事舍人禮贊皇太子再拜師傅等少避位訖師傅爲班首者一人進賀訖復位再拜皇太子答賀訖又再拜皇太子揖師傅退出內侍奉引皇太子就座南向座訖通事舍人引文武官臣三品以下入就北向重行異位立定奉禮曰再拜訖左庶子一人進跪具宮臣某等言賀訖復位皆再拜

各分班東西序立奉禮曰再拜在位官皆再拜訖左庶子少前跪奏具官臣某言禮畢近侍垂簾皇太子降座宮臣侍衛仗散如儀一准會要貞觀十七年上謂房元齡曰太子三師以德導人者也若師禮卑則太子無所取則於是詔令撰三師儀注太子出殿門迎先拜三師三師答拜每門讓三師坐太子乃坐與三師書前名惶恐後名惶恐再拜右據太常禮院狀謹檢開元故事禮閣新儀及會要分析如前其師傅見親王不同皇太子見師傅臣請師傅親王對拜揖各退奉勅宜依



鄉飲

後唐清泰二年九月中書門下帖太常以長興三年勅諸舉人常年薦送先令行鄉飲酒之禮宜令太常草定儀注班下諸州預前隸習解送舉人之時便行此禮其儀速具奏聞

初長興中宰臣李愚好古奏行此禮累年不暇至是愚復奏及觀禮官所定無緒禮官孫知訓以古禮無次序不可施行博士或言梁朝時青州會行一度遂令青州訪舊簿書以聞竟不能行

講武

梁開平元年十月駕幸繁臺講武至二年七月改爲講

武臺

按地里志本西漢梁孝王所築謂之吹臺其後有繁氏居其側故里人呼爲繁臺

牋表例

後唐同光二年八月勅四京併諸道州府及京百司應申奏諸色公事奏狀等先會指揮並須實封斜角其常呈奏狀於斜封上明題所爲公事或干軍機言不題事直至御前開封進呈事宜指揮四京及諸道令散下管內諸州依元宣旨處分其在京百司仍令御史臺各錄勅文曉告

天成元年七月勅三京諸道節度團練使防禦使勅使文武將吏州縣職員皆進月旦起居表其四孟月旦並



可止絕

三年七月二十一日勅今後天下諸州刺史及係屬節鎮團練防禦使除應聖節冬至端午外謝上及每月起居慶賀章表並付本道封進其餘公事准往例節度觀察使臆覆奏聞

長興元年五月太常禮院奏皇后今月十四日受冊准舊儀外命婦並合赴皇后受冊正殿門外就次俟受冊訖司賓引入就位奉賀今未有命婦院請准例上表賀中書門下奏其諸道節度使上表賀皇帝其在朝外命

婦所上皇后表章進呈訖不下令報答自此不便進表皇子妻駙馬公主及近密親屬或有慶賀及進起居章表內中委人主掌進呈後祇宣示來使並不下令從之其月太常禮院奏按儀制令百官上疏於皇后曰皇后殿下中外臣寮外命婦慶賀祇呼殿下不言皇后中書覆奏據太常禮院狀若祇呼殿下恐未合宜至如舊制皇太子亦呼殿下若無分別何顯尊卑凡上皇后章表內請呼皇后殿下若不形文字尋常並呼皇后從之二年五月樞密院條疏諸道報軍機表狀於斜封上不



五代會要  
卷四  
得言爲何事宜二字

晉天福二年十月中書門下奏按禮閣新儀正元二年十月七日御史臺奏每月慶賀及諸上表並合上公之制可今後凡有謝賀上表望並准元勅上公行之如三公闕令僕已下行之中書門下別貢表章從之

臣徐立綱恭校



